

〈華嚴經疏玄談總科 / 第七門・部類品會〉

編按：本科判為美國法界佛教總會/中文網站製作

節自於唐澄觀法師《華嚴經疏》科判之簡略

A7 部類品會（分二）

B1 總辨來意 第七部類品會者。既知旨趣冲深，未審能詮文言廣狹。

B2 開章別釋（分二）

C1 開章 於中有四：一彰本部，二顯品會，三明支類，四辨論釋。

C2 解釋（分四）

D1 彰本部（分二）

E1 總明 初中，性海之詮，常說徧說；言窮法界，難可限量。

今自陝之寬，略為十類。

E2 別釋（分十）

F1 略本經 一、略本經。即今所傳八十卷本，及舊譯六十卷；

皆是十萬偈中之略，譯未盡故。

F2 下本經 二、下本經，謂摩訶衍藏。

是文殊師利與阿難海於鐵圍山間結集此經，收入龍宮。

龍樹菩薩往龍宮，見此大不思議經，有其三本。

下本有十萬偈、四十八品，龍樹誦得，流傳於世。

故智度論名此為不思議經，有十萬偈。

梁攝論中名百千經，西域記說遮拘槃國有此具本。

F3 中本經 三、中本經。即彼所見有四十九萬八千八百偈、一千二百品。

F4 上本經 四、上本經。即彼所見，

有十三大千世界微塵數偈、一四天下微塵數品。

此上二本，非閻浮提人心力能持，故不傳之。

F 5 普眼經 五、普眼經。即海雲所持。

以大海量墨、須彌聚筆，書此普眼法門，
一品中一門，一門中一法，一法中一義，一義中一句，
不得少分。何況能盡？但是入深法界菩薩陀羅尼力之所能持。
已下諸經，並非凡力能受。

F 6 同說經 六、同說經。謂約一類須彌山形世界，徧於虛空容毛端處，
以言聲說無有窮盡。如不思議法品云：「如一佛身，以神通力，
轉如是等差別法輪，一切世法無能為喻。如是盡虛空界，一一
毛端分量之處，乃至一一化身，皆如是說。音聲文字句義，
一一充滿法界等。」又阿僧祇品云：
「光中見佛不可說，佛所說法不可說，乃至於彼一一修多羅，
分別法門不可說等。」此意但約一類音聲說法，已不可結集。
豈下位能持。

F 7 異說經 七、異說經。謂樹形等，世界既異，其中眾生報類亦別。
如來於彼，現身立教，施設不同。不可定其色與非色言非言等。
則部類難量。

F 8 主伴經 八、主伴經。謂遮那所說雖徧法界，然與諸佛互為主伴。
如說十住時，十方來證皆言我國皆說等。則前七經皆有主伴。

F 9 眷屬經 九、眷屬經。謂餘根器不能聞此通方之說。
隨宜說教，令入此門。皆為此經勝方便故，名為眷屬。
故下經云：「普眼修多羅，以佛刹微塵數修多羅為眷屬等。」
則前八皆有眷屬。

F 10 圓滿經 十、圓滿經。謂此上諸本，總融為一無盡大修多羅海。
隨一會一品、一句一文，皆攝一切，無有分限。故現相品云：
「毗盧遮那佛，願力周法界；一切國土中，恆轉無上輪等。」
故七十三中名圓滿因輪，此之謂也。

D2 顯品會（分二）

E1 總明 第二、品會差別者。即顯今經與晉譯同異。

E2 別辨（分二）

F1 明會不同 今經九會，以晉經第七會初闕十定品重會普光，故唯八會。

F2 彰品不同 今有三十九品，初會有六品。

彼經唯三十四，由初會中唯有二品：

一、世間淨眼品，即今世主品；

二、盧舍那品，即今現相已下五品。

初會闕四兼闕十定，故唯三十四品。

餘諸品會大同，名有小異，至文當顯。

D3 明支類（分二）

E1 顯支流 第三、明支類者。於中復二：先顯支流，即別行經。

藏中兜沙經一卷，是名號品。

菩薩本業經一卷，是淨行品。

小十住經一卷，是十住品。

大十住經四卷及漸備一切智德經四卷，並是十地品。

等目菩薩所問三昧經二卷，是十定品。

無邊功德經一卷，是壽量品。

如來性起微密藏經二卷，是出現品。

度世經六卷，是離世間品。

羅摩伽經三卷，是入法界品。

此等並是隨器受持，大本支出。

E2 明流類 二明流類。謂修慈經一卷、金剛鬘經十卷、

如來不思議境界經一卷，並是華嚴流類，而非本部別行。

或是別行來未盡者，未敢詳定，餘如纂靈記辨。

D4 辨論釋（分二）

E1 總標 第四、論釋者。略舉其四：

E2 別釋（分四）

F1 龍樹菩薩 一、龍樹既得下本，遂造大不思議論。亦十萬頌，備傳西域。

此方十住毗婆沙論十六卷，即是彼論釋十地中初之二地。

F2 世親菩薩 二、世親菩薩，造十地論，釋十地品。

魏朝勒那三藏，及菩提流支，各翻一本。

光統奏請，令二三藏參成一本，為十二卷；即今見傳。

F3 北齊劉謙之 三、北齊劉謙之，於清涼山感通造論六百卷，備釋一經。

F4 後魏僧靈辨 四、後魏僧靈辨，於五台山頂戴此經，行道一載，

遂悟玄旨，造論一百卷；亦傳於世。